

第一名

沈宛瑩

食百五

得獎感言

八九冬前，我拄開始寫台文ê時，袂輸寒天空lòng-lòng ê燕仔siū，誠稀微。三四冬前，發覺愈來愈濟朋友會曉讀台文，ooh！原來是我ê朋友換了一輪。最近，無咧聯絡ê朋友越倒轉來，手中提一本台文冊來共我問。ooh！原來「越頭症」嘛會當按呢。春天，燕仔飛倒轉來，孵卵生焠，晟養後一代。母語是矜簷跤ê鳥仔siū，恬恬等待出外ê浪鳥閣飛倒轉來。感謝台文ê先進佢有志，感謝當初時，無欲放棄ê家己。



食百五

伊共目睷擘開，壁頂ê日拆仔寫「2149年12月31日」。

日頭已經欲落山矣，街仔路人聲冲冲滾。路--lí吊規排鼓仔燈、插規逝ê布旗仔，人海一路窒去到「百五層樓仔」——放煙火ê所在。

黑川希奈倚佇「百五層樓仔」下跤，伊穿一軀正範ê烏色西裝，揸一跤烏色kha-báng，擰頭看這機通天塔。想起古早ê經典敢若捌有一个號做「巴比倫」ê通天塔。伊幌頭，tsuái冊攏予人禁了了矣，凡勢伊記毋著去。黑川行入去金光閃閃ê百五層樓仔，提出伊ê記者證予服務處櫃台人員看：「你好，我恰日下部部長有約採訪。」

「有，部長有交代，黑川記者，請。」櫃台ê人tshuā伊來去到金爍爍êVIP流籠頭前，有一个安檢門：「『永生樓』是部長ê私人住所，愛請黑川記者先駛安檢門。Kha-báng園籃仔底，人對遮過去。」黑川照指示做，安全過關。伊共kha-báng揸起來入去流籠。

「這位記者小姐欲去『永生樓』。」櫃台人員共流籠人員交代。黑川看流籠小姐揸「150」，發現這個流籠揸鈕無4樓也無44樓，144樓嘛無khuàinn，所有ê「4」攏換做「F」。

黑川金相流籠內ê樓層顯示器：……10、11、12、13、1F、15……

「雖然民間攏共阮這棟號做『百五層樓仔』，毋過正式ê名是『永生塔』喔！F for Forever, Forever Tower.」流籠小姐若像是注意著黑川ê好玄，共解說。

永生塔聽起來袂輸頂世紀才會有ê靈骨塔建案，hàng，驚死驚甲這個程度有影了然。

黑川頓頭但是並無代表認同。流籠小姐犯職業病，接續閣想欲介紹：「永生塔ê F樓、FF樓、1FF樓就是」

「是過身ê部長夫人紀念館，將夫人ê人生分三段所做ê展覽。」而且閣真袂見笑是常設展。

樓層來到31、32、33、3F、35……原來過三十樓ê風景遮無仝。伊對琉璃流籠看出去，永生塔外口ê大路十花五色，遮較晏應該就會真適合賞夜景恰跨年，講是跨年，明仔載tshiāng拄tshiāng是日下部彼齒ê生日，伊動用國家機器，予全國人民tsuánn為伊慶祝。

「著！我個人上推薦FF樓，是部長恰夫人兩人欲一世紀ê愛情故事！部長為著愛人破病無心臟通換，推動《永生法》嘛造福咱社會，真可惜夫人差一冬就會使食百二。請一定愛會記得紮衛生紙，我看這個展覽看甲目屎碇碇流。」

我看你是話屎濟，黑川佇心中吊白仁。

流籠小姐繼續kiák-kiák叫：「尤其是夫人揀心臟科ê理由是想欲知影部長ê心，諱！足浪漫ê，in是天生一對。」

黑川為著今仔日ê專訪已經做過真濟研究：「了解，彼展覽我有看過矣。」夭壽歹看。黑川激外外，伊佇玻璃頂懸ê影結一个伊到今攏看袂慣勢ê面腔，面腔ê後壁是城市ê繁華，家家戶戶點電火，同齊等待明仔載來臨。

新年連鞭欲到矣，伊無需要綴這個舊社會行生份禮，嘛免煩惱捌人按怎共伊想。

Tiang！「永生樓到矣，請。」

黑川一个人來到客廳，紅色藍色交插ê設計師膨椅形若一大粒心臟，頂懸坐一个頭毛烏金ê阿伯ê背影，膨椅背門向露台，外面ê景緻有遠山伶彩雲，有影真嬌。

「攪擾矣。」

「記者小姐，你來矣。」日下部旬無倚起來，坐咧招呼。「來坐啊，欲啉紅酒無？」

「免。多謝部長。」

「煞袂記得恁少年腦無咧啉酒--ê，我遮有冠軍茶，你袂介懷我這茶米是對焚化爐彼跡ê茶園來ê敢會？」日下部喙笑目笑，伊是通知黑川，毋是借問，滾水早就沖入去茶鉗。

「我袂掛意。」黑川坐落來，講：「自從健保有保障焚化爐、火力發電廠、工業區附近ê民眾有通每十冬免費換肺，經濟就加真穩定，社會治安嘛愈來愈好。」

「Ooh？你有做功課。」日下部微微仔笑，一百四十九歲ê面笑起來煞干焦六十幾歲ê皺痕。

「這是應當--ê。」茶猶燒燙燙，黑川煞無要無緊啉一喙。

「袂傷燒--nih？」

「袂。」黑川將茶甌園予好，注意著茶桌頂有一支花矸仔。「部長ê這支花矸仔真好看，哪會無插花？」

「花啊，無久長ê物我無恰意啦。矸仔是阮tsáu孫學校ê功課，伊猶在世ê時陣，會定來插花，這馬伊無佇咧就無人插--loh。」

「原來，部長敢會記得伊插啥物花？」

「彼我哪會記得啦，是伊讀國校仔抑是國中ê代誌--neh！伊過身偌久矣？若猶活咧，應該嘛六十歲矣。」

「五十九歲。」黑川講，日下部頓證。「我有做功課。」

「姑娘仔袂𦵇--ooh！有前途。聽講你是跳級生，你今年幾歲？」

「二十九。」

「腦歲二十九？」

「腦歲二十九。」黑川對kha-báng內搜伊ê錄音筆恰紙筆出來準備採訪。「時間ê關係，咱就先來採訪敢好？」

「我時間真濟啊，是恁少年腦才會做代誌緊焔焔，愛細膩毋通火燒心--ooh！是講若燒去會使去換掉啦，哈哈哈哈哈……」日下部予酒鑿甲一直嗽。「哈，歹勢，我ê肺期限欲到矣，愛閣來換。採訪敢開始矣？」

「這馬開始。」黑川共錄音筆擲落去：「請問部長，你八十歲所推動ê《永生法》就是以『150歲延壽目標工程計畫』做藍本，明仔載你就欲達成150歲ê目標矣。阮逐家攏知影部長你真疼某，毋過夫人過身已經三十冬，請問部長明仔載生日過了，未來敢有啥物拍算？」

「Honnh，這條題目加問--ê，哈哈！我無啥拍算，我食到這個歲數，tō時到時擔當，無米就煮下水湯。我欲共各位讀者朋友講『性命是無終點--ê，先活咧！活咧就有無限ê未來，活咧就是成功！』記者小姐，這句話請會記得幫我high-light起來。」

「了解。」黑川假做筆記。「部長，你牽成『永生委員會』然後創立『永生部』佢提案通過《永生法》，造福真濟人民。咱敢會使簡單來分享《永生法》對國家社會上大ê貢獻是啥？」

「無毋著，我佇六十九冬前推動《永生法》，因為阮牽--ê破病需要換心臟。恁嘛知影，伊是心臟科醫生，醫治千萬粒心臟，煞無通治家己。所以我四界走從，揣無心臟……這馬想起來猶是會艱苦。」

日下部閣啉一喙紅酒，若品酒若品過去ê回憶，紅酒這馬就敢若伊ê性命水全款，若無伊就真正是無血無目屎。伊喘大氣，繼續講：「所以我引入頂世紀美國Standford大學誠tshing ê『社會處方設計』，想欲揣雙贏ê方法來改變社會。落尾提案上早期版本ê《永生法》，保障弱勢未婚有身ê tsáu囡仔，予in有通領錢重新開始in ê 人生，同時閣會使對社會有貢獻、幫贊破病ê人，予huái tsáu囡仔毋免落胎，減輕in心中ê罪孽。」

「所以《永生法》上大ê貢獻是……？」烏箱強行通過，利用社會弱勢，尤其是無權無勢ê散赤少女變做合法ê「下水塹仔」，為好額人提供延壽ê零件。黑川早就知影這個陰謀，毋過親身聽著有影欲吐。姑不而將共心火吞忍落腹，保持客氣、專業、好禮ê笑面。

日下部ê紅酒已經空矣，伊起身閣湊滿：「《永生法》上大ê貢獻就是共『死亡』——這項上大ê變數，對社會中排除，毋但延長咱ê歲壽，嘛有通維護咱社會文明ê秩序。若無人死，活人就袂艱苦，逐工攏歡喜，你講是毋是？」

黑川無應，伊想起近五十冬，新創公司一間倒過一間，社會上已經真久無出新ê科技產品矣，因為有錢ê人攏是「老腦」，in ê 頭腦綴袂著新時代

物件，所以公司規氣就buái研發新功能、新產品，社會就按呢凍佇2030年代，有餐廳到今嘛猶未鬥「掃QR code叫菜」系統，因為現此時猶有序大人無恰意繫手機仔出門，而且這馬早就毋是「超高齡社會」矣，是「長生社會」閣較來ê「永生社會」——雖然外表看無啥明顯，毋過80歲以上人占50pha，兩人中就有一個人已經超過80歲矣。

雖然黑川攏共筆記印佇頭殼內矣，伊猶是假影一下家己ê雜記簿：「……講著『死亡』恰『秩序』，咱一定就袂使無講著部長夫人——月影愛理女士。」黑川共日下部gió一下，伊無啥表情，黑川繼落去講：「夫人佇119歲時陣予腦科醫生診斷失智症，若照《無用者釋放條例》，所有『無用者』攏有三個月時間會使準備告別，是按怎彼陣ê新聞記錄是『釋放日』彼工，刑警入來到恁厝內共夫人tshuā走？你身為部長，彼工哪會無表態抑是阻擋？」

「愛理是驚我會艱苦才一直隱瞞，雖然無法度恰伊白頭偕老永遠做伙是我這生上大ê遺憾，毋過愛理ê例嘛證明《永生法》ê公平，著算是部長家屬也著愛照品照行，遵守恰維護咱社會ê秩序。你欲講愛理ê死是我ê犧牲嘛會使得，伊知影我會目睷金金看伊予人tshuā走，一切攏是為著閣較大ê理想。」

理想？黑川心肝頭彼空看袂著ê空喙咬牙tshiat齒。「對部長來講，理想ê社會是按怎樣？咱這馬社會敢是？」

「這馬就是啊！就是我拄仔講ê『無人死，活人就袂艱苦。』若準拄一定愛有人艱苦，我盡量控制佇上少數閣無貢獻ê族群，像我恰愛理就甘願做彼个犧牲。這就是比例原則嘛，盡力予多數人民歡喜，按呢社會較會穩定。無用者毋但失智症病人，閣有腦功能受傷ê智能障礙人士、行動無便需要輪

椅ê人、植物人嘛是，遮ê人無法度閣為社會貢獻，社會顛倒愛開資源共in照顧。愛錢起無障礙便所啦、啥物無障礙輪椅崎啦，占空間閣成本懸！啊尤其是彼博愛位，加足濟衝突--ê，敢無？所以咱是毋是將遮ê資源『釋放』出來予認真拍拚生活而且身體勇健ê人民會較公平，按呢嘛較符合經濟效率？病人少ê國家才會勇！可比講，以早我做市長，共病院照護人力釋放出來去晶圓廠作檯，你看，咱ê GDP毋是逐冬攏起飛？」

「咱國家這馬ê GDP大部份是自科技、半導體產業來--ê，根據學術期刊《白鬚報》ê研究，咱社會中有一半ê人排斥使用科技產品，而且in閣是社會經濟地位較懸ê老腦，部長敢有想過按呢咱國家ê競爭力佇佗位？」

「你閣真gâu問。咱ê競爭力毋但醫療方面，工商業就是有毋驚死ê勞工。你毋是有做作業？火力發電廠、焚化爐邊仔ê居民，會使免費換肺啊！內底ê員工自然福利就並外口ê人較濟囉！斷跤斷手有通接，破腹流腸嘛有法度換新--ê，只要頭殼無懸懸攏會使救。有佢濟外商欲來咱國家設廠--lih！」

「所以你將國民ê肉身看做是一款『毋驚死ê資源』？」

「我袂講國民是政府ê資源，恁攏是我這個爸母官ê囡仔。《永生法》是我替囡仔簽訂ê一份『愛ê保險契約』，恁共短命ê肉身交予國家，我這個做爸母--ê才通對死神手頭將恁ê命買倒轉來。這個契約是予每一個向望存在ê靈魂，上溫暖、上有篤ê不滅保障。」

「不滅保障……部長你是『無盡教』ê教友，按呢你是毋是就無認同拒保這種『愛ê保險』ê『歸塵社』地下異議份子？根據我ê調查，你ê查某囡日下部明惠女士佢囡婿高野隼先生是『歸塵社』ê成員，你敢知影這件代誌？」

「記者小姐，你按呢問無啥專業佢客觀--ooh！毋過少年腦會遮衝碰，我會當理解，siáng無青春過？我猶是會用公正ê心態回答你這條問題：我認為各人有各人ê理想，我ê tsáu团佢我ê理想無全，我嘛尊重。不管如何，伊身軀頂tō有我ê一條X染色體。in兩個翁仔某加入歸塵社，所以照社規愛自然生团，無像愛理佢我，佇五十外歲委託代理孕母生囡仔，in是趕緊緊佇38歲拚一个孫予我抱，圓我這個阿公夢，這毋就代表阮理念無全嘛無影響厝內感情？只是in三口灶猶是予激進ê『無盡真理會』教徒謀殺，兇手嘛認罪矣，雖然遺憾，我嘛干焦會使接受。啊，講起來彼工嘛是12月31號，in駛車欲來揣我佢愛理門陣去食飯，我彼个tsáu孫仔閣先電話留話講：『阿公你愛會記得紮花矸仔，我有攢生日禮物欲予你。』啊我嘛有攢伊上佢意ê金平糖（khòng-phè-tō）欲予伊。哎，紮花矸仔是欲創啥？煞予車仔拚拚死，我tō永遠毋知影答案矣……來，我揣出彼條音檔予你聽，我佢真子感情真好啦！伊是我心肝頭ê寶貝--neh，發生這件代我嘛真毋甘啊！彼音檔我不管時攏會擲來聽，你若需要做報導ê題材，我嘛會使提供檔案予你。」日下部對橐袋仔擣手機仔出來，共目鏡嘛掛予好，認真揣彼條留話。

「免遮工夫，其實我今仔日來毋是來共你採訪--ê。」黑川tsip一喙涼去ê茶，共錄音筆禁掉。日下部停止動作，時間毋但佇伊ê面皮也佇伊ê身軀頂堅凍。

「若無，你是欲來創啥--ê？」

「我來討公道--ê。」

「哈！公道？啥物公道？」

「你袂記得矣？你拄仔毋是講今仔日是恁查某团三口灶過身ê日子，敢毋是？」

「你是歸塵社ê社員？siáng叫你來--ê？」日下部ê表情懷疑摻驚惶，應該是咧疑問：歸塵社應該佇三十冬前就攏處理清氣矣才著。

「恁某。」黑川用伊ê平板放一塊影片，共tu去到日下部面頭前。

畫面上，愛理女士穿一su藍色洋裝坐佇「釋放機」，伊ê精神真好，紅膏赤蠟。

「敢開始矣？」愛理女士對鏡頭問，鏡頭後壁ê人講一聲OK。

「我是月影愛理，今年腦歲119歲。今仔日是2122年10月26號。拄仔予刑警掠來『釋放所』，因為我得著失智症無共阮厝--lí人講。照法律，等咧就欲釋放矣，毋過我猶是有真濟話想欲對阮翁講。」

「這一定是AI影片！」日下部頓桌。

「請你較有耐心，攞食甲欲百五矣，你毋是講你ê時間真濟？」

愛理女士勻勻仔講話：「親愛ê旬，你敢會記得咱頭一工見面，我是大學一年仔，你是醫學院ê siān-pái？彼工我穿一su藍色ê洋裝，你講恁阿母捌講嬭姑娘仔攞是用水做--ê。我今仔日共伊穿倒轉來，你看有嬭無？」愛理女士倚起來盪一輪，看起來完全無親像是著失智症ê人。這項代誌日下部毋捌共任何人講起，因為伊無想欲予人知影伊ê媽媽其實專門咧借腹替人生罔，日下部家己就是其中一个予人退--ê。伊白手成家，家己拚甲今仔日這位。黑川注意著日下部ê眼中專是驚惶，目屎佇目箍內咧欲「瘡」出來，伊煞看甲喙尾浮一尊好笑神。

愛理女士坐轉去釋放椅，不時擰頭嚴肅對鏡頭：「我無失智，我只是毋願閣恰你這款怪物鬥陣。我佇78歲彼時就講我免換心臟，是你堅持愛換，彼時你想欲做永生部部长，需要新聞，強迫我陪你搬戲。你做部長了後，千尋無偌久就失蹤去矣。我知影是你，千尋自阮讀大學ê時就咧研究意識轉移，伊彼个計畫會擋著你賣器官ê財路，所以你共伊處理掉矣。」

黑川回憶伊揣著ê新聞資料，高野千尋醫生是腦科權威，嘛是日下部ê親家。有一工，千尋醫生就消失矣，就親像失智症病人ê記持，落尾，世間嘛袂記得彼个人叫啥矣。

「我買通腦科醫生，將我斷做失智。你一定想袂到，腦科雖然是這馬醫學院怡病院上無受歡迎ê科別，煞是上有仁心ê一陣人。」愛理女士正手貼伊ê心肝頭：「你做啥物代誌，你家己心內知知。哎唷，我煞袂記得，彼敢是你ê心？你ê良心佇佗位？」

日下部吼一聲操心攣腹，目屎涌涌滴，伊雙手掩面無願意繼續看。影片內底ê愛理女士行到鏡頭前跼落來，袂輸咧摸日下部ê喙賴全款，頭向落來佇伊ê耳仔邊。日下部有一目矚仔ê時間，親像有鼻著愛理ê芳水味，伊溫柔捋日下部ê鬢髻，愛理輕聲細說：「我愛你ê彼粒心，早就予你換掉矣。」日下部哭甲毋成聲，伊想欲共目屎抹抹掉，雙手煞沐甲紅絳絳ê血專專是。毋知對當時開始，紅酒、血、目屎、汗，佇伊ê世界中，老早就攏是紅色--ê矣。

伊利用牽手做藉口，通過《永生法》，換來紅光赤日頭ê權勢恰虛華ê人生。食甲欲百五歲矣，這馬才知影伊是用愛來換一世人ê稀微，而且伊ê這生恐驚仔是無盡尾--ê。

愛理女士行轉去釋放椅，喙笑目笑倒佇椅仔頂，表情若予母親攬牢牢ê紅嬰仔遐安心。鏡頭後壁行出一個白袍醫生，若像是車禍過身ê罔婿高野隼。

「伊毋是死矣？」日下部真驚惶，彼工去認屍，看著翁仔某兩個ê皮肉攏碎糊糊，應該是穩死矣？但是面目嘛攏看無……

錄影內ê愛理女士若親像聽會著日下部ê反應，寬寬仔說來：「這位是黑川醫生，真子愛叫伊『阿叔』，也就是千尋ê細漢後生：本名是高野拓。只是想袂著你竟然連家己ê查某团恰团婿嘛欲滅口！千尋恰in出代誌了後我就共拓君藏起來矣。人伊最近收養一个古錐ê嬰仔喔，你名敢號好矣？」愛理女士頭越過去問醫生。

「黑川希奈。」高野拓醫生共機器頂ê線路接佇愛理女士ê頭殼。

「希奈、Hine，古早古早原住民地下女神ê名，mh，是好名。」

彼台機器發出phik-phok、phik-phok、phik-phok ê聲。醫生提出一个琉璃矸仔，內底親像是貯ê金平糖，tīng-tīng-tóng-tóng。跤頭跌想嘛知影，彼才毋是糖仔。愛理女士雙手伸出去，用上慎重、神聖，甚至是莊嚴ê態度，共糖仔接佇手盤中——一喙hap--lueh。

「未來就交予恁矣喔！」

phik-phok、phik-phok、phik……phok、phik……phok……、
phik……phok……phik……

黑川共平板收轉來：「愛理阿媽講，伊感受著ê每一下心跳，逐秒鐘攏予伊足想欲吐，因為這粒心臟原底有家己ê人生。你咧？你胸坎內ê心臟，敢無家己ê人生？應該講，我ê人生？」

「你ê人生？」

「我是彼粒心臟ê主人啊！」

「無可能，這粒心臟ê主人這馬若活咧，應該欲六十歲矣，你無可能！」

「部長，你真愛講耍笑，人若無心臟欲按怎活？若準會使活，嘛是五十九歲，毋是六十，拄才毋是有講過矣？」

「你到底是siáng！？」

黑川擲一項物件出來，tīng-tīng-tóng-tóng，琉璃斫仔內底ê金平糖佇伊ê手頭咧唱牽亡歌ê款。伊細膩園佇花斫仔邊仔。

「阿公，我是你ê查某孫高野真子。」

「你烏白講！阮tsáu孫一家伙仔早就出車禍過往矣！」

「敢按呢？敢毋是你默許無盡真理會去暗殺千尋阿媽？爸爸恰媽媽？」

「我無！」

「敢毋是你發現我變植物人就共我關佇『下水塭仔』做代理孕母十四冬？敢毋是你等到我30歲無適合生囝了，就活割我ê心臟去換？咱全一家伙仔，全血型，袂有排斥。你算盤算甲tiak-tiak叫，你掠準無人聽著？我彼陣是植物人，毋是臭耳聾。」

「彼攏是照法律規定行！女性植物人，女性智能障礙huái，猶有生育能力就毋是『無用者』，愛服『培養役』到30歲！」

「煞毋知法律你寫--ê，法庭你開--ê，欲講法律是毋？我若這馬共你刳死，我嘛無犯法喔！」

「你！刳人哪會無犯法？！」

「你若是少年人，刳你就是犯『損毀有用器官罪』，毋過你是老腦，刳你是犯『非法終止延續權罪』爾。閣再講，in掠--ê是黑川希奈這幅身軀，毋過真子ê意識這馬佇雲頂，會使隨時download。啊，講白話予你老腦聽較有：我就是『借屍還魂』，我ê魂魄閣會使出出入入，是上新ê意識移植技術。」

「無可能、無可能，我彼陣明明to共彼个計畫ê研究者攏處理掉矣！」日下部ê情緒接載袂牢，伊足想欲規氣昏昏死來逃閃，毋過心臟猶真勇健。

「佢你毋免解說遐濟，你老腦嘛聽無。你總算承認你共千尋阿媽暗殺矣。」

「我真正無！」

「莫閤硬諍矣。」黑川將琉璃罐仔交予日下部必必掣ê手盤，講：「你ê人生無局矣，我拄仔所經驗ê一切攏經過我ê意識，已經傳起去雲頂矣，真緊就會炭開，社會大眾會知影你就是藏鏡人。」

日下部氣喘無啥有，規个人見笑甲跪佇黑川ê面頭前。

黑川共家己ê手機仔提出來，放一條音檔：「喂？阿公阿公，你哪會攏無接？阮這馬佇……爸——媽——阮佇佗位？……喔，阿公，媽媽講差不多10分鐘就到矣，你佢阿媽先來巷仔口等喔！啊你愛會記得紮花矸仔，我有攢生日禮物欲予你。愛會記得喔！」

日下部用gih-gih掣ê彼雙手共玻璃罐ê草窠仔tshuah起來，真毋甘願才將彼罐糖仔總hop--lueh。糖仔佇伊ê喙中融做鹹酸苦泔ê人生百味，是食過一百外冬ê山珍海味袂比得--ê。伊聽著胸坎內底真子ê心跳，死亡ê甜蜜佇伊ê腹內炭擔，總算，伊佇外面民眾ê歡呼聲中覆落來。

新年進入倒數。

五，phik-phok……黑川手伸入去kha-báng。

四，phik……phok……伊提出一束永生花。

三，phik……phok……插入去伊細漢時所做ê花矸仔。

二，phik…………phok…………跔落來到𠵼白瀾ê日下部耳仔邊。

一，phik…………phok…………細聲話：「阿公，生日快樂。」

Siu——磅！

窗仔門外口燦爛輝煌ê煙火，雖然一下仔就化去，毋過一蕊接一蕊，一蕊大過一蕊。黑川將阿公ê兩蕊目睷合起來，𠵼過伊ê屍體，大步行出房間，擲流籠起來。流籠ê門是兩面鏡，黑川詳細睨鏡中ê面腔，遮爾濟冬矣，伊猶是看袂慣勢。心不由自，伊神遊到細漢ê記持。

「真子？真子？」真子擘開目睷，天篷已經毋是伊看十四冬ê「培養房」矣。是一揸古錐ê動物𦍋仔，壁頂ê日拆仔寫「2120年12月31日」。有一个序大人倚佇奶母車邊仔。

「爸爸？」敢是咧眠夢？過十四冬，爸爸加真老。

「哎唷，我是你ê阿叔。恁爸爸恰媽媽已經車禍過身十外冬矣。」

「啊？」真子想欲跔起來，煞看著家己ê跤佇空中躡，伊共家己驚一趔。過去有十四冬無法度振動，現此時「動跤動手」真快活。

毋過我ê跤恰手哪會遮爾仔細肢？

「真子啊，你身軀ê筋肉猶未生好，所以無法度反身，這馬講話嘛袂清楚，毋過閣過幾個月仔就會好真濟矣，一暝大一寸嘛！」

我這馬是紅嬰仔？

「阿叔提著你ê腦，用意識移植共你『復活』佇頭腦空白ê新生仔，予你會當重新過一改16到30歲的人生，毋過閣愛委屈你過第二擺1歲至15歲。啊，你按呢敢是算天才？無定著會使跳級喔！」

16到30歲？是無暝無日ê格仔天篷，是七改ê生產，最後閣活拆腹內。雖然是植物人，心猶是真艱苦。十四冬予人凌遲ê日子總算是透尾矣。重新來過，共上青春ê光陰閣活倒轉來。

紅嬰仔笑笑表示同意。

「是講你就袂使用『高野真子』這個名矣，阿叔ê假姓是黑川，共你號『黑川希奈』。Hine是地下女神，伊共數想永生ê半人半神Maui創死，換來全人類ê世代生焮。畫本佇遮，你以後會使讀，你以早讀過矣？阿媽嘛真恰意這個名喔！」

「阿媽？」紅嬰仔發出簡單ê聲。

「嘿，千尋阿媽恰愛理阿媽攏恰意。愛理阿媽最近予人釋放矣，你放心，伊無病無疼。這講起來真複雜，等你閣較大漢，到捌代誌ê年歲，阿叔會共阿媽in ê記持攏灌予你知影……」

伊共目睭擎開，流籠門也開開矣。